

Komisioni për Mbrojtjen e Konkurrencës në bazë të nenit 28 dhe nenit 19 paragrafi (1), pika 2) të Ligjit për Mbrojtjen e Konkurrencës („Gazeta Zyrtare e Republikës së Maqedonisë“ nr. 145/10, 136/11, 41/2014, 53/16, 83/18 dhe „Gazeta Zyrtare e Republikës së Maqedonisë së Veriut“ nr. 208/24 dhe 16/25), dhe duke vepruar lidhur me njoftimin për përqendrim të parashtruar nga Proeks Internacional L.L.C., me seli në rr. „Fehmi Lladrovci“ nr. 32, Prishtinë, Kosovë, përmes Shoqërisë së Avokatëve Knezoviq dhe bashkëpunëtorët nga Shkupi, në seancën e mbajtur më 25.08.2026, miratoi këtë

AKTVENDIM

1.Konstatohet se përqendrimi me të cilin Proeks Internacional L.L.C., me seli në rr. „Fehmi Lladrovci“ nr. 32, Prishtinë, Kosovë, synon të fitojë kontroll mbi Shoqërinë për tregti me pakicë TINEKS MARKET SHPKNJP Shkup, me seli në rr. „Vasil Gjorgov“ nr. 16-1-mansardë 1, Shkup, edhe bie nën dispozitat e Ligjit për Mbrojtjen e Konkurrencës, nuk do të ketë si pasojë pengimin, kufizimin ose çrregullimin e konsiderueshëm të konkurrencës efektive në treg ose në një pjesë thelbësore të tij, veçanërisht si rezultat i krijimit ose forcimit të pozitës dominuese të pjesëmarrësve, dhe **është në përputhje me dispozitat e Ligjit për Mbrojtjen e Konkurrencës, në kuptim të nenit 19 paragrafi (1), pika 2) të Ligjit për Mbrojtjen e Konkurrencës.**

2.Detyrohet parashtruesi i njoftimit për përqendrim të paguajë taksë administrative për njoftimin e përqendrimit në shumën prej 6.000,00 denarë, si dhe për aktvendimin në shumën prej 30.000,00 denarë, sipas Tarifës nr. 34 të Ligjit për Taksat Administrative („Gazeta Zyrtare e Republikës së Maqedonisë“ nr. 17/93, 20/96, 7/98, 13/01, 24/03, 19/04, 61/04, 95/05, 7/06, 70/06, 92/07, 88/08, 130/08, 6/10, 145/10, 17/11, 84/12, 192/15, 23/16 dhe „Gazeta Zyrtare e Republikës së Maqedonisë së Veriut“ nr. 151/21), në llogarinë e Buxhetit të Republikës së Maqedonisë nr. 100000000063095, llogaria e pagesës 840...03161, kodi i të ardhurave dhe programi 72231300.

3.Padia për fillimin e kontestit administrativ nuk e shtyn ekzekutimin e aktvendimit.

Arsyetim

Në përputhje me dispozitat e nenit 15 të Ligjit për Mbrojtjen e Konkurrencës (në vijim: Ligji), më 10.08.2026, dhe e plotësuar më 11.08.2026, Komisionit për Mbrojtjen e Konkurrencës i është dorëzuar njoftim për përqendrim nga Proeks Internacional L.L.C., me seli në rr. „Fehmi Lladrovci“ nr. 32, Prishtinë, Kosovë, me të cilin Proeks Internacional L.L.C. synon të fitojë kontroll mbi Shoqërinë për tregti me pakicë TINEKS MARKET SHPKNJP Shkup, me seli në rr. „Vasil Gjorgov“ nr. 16-1-mansardë 1, Shkup.

Komisioni filloi shqyrtimin e njoftimit në ditën e pranimi të tij dhe, në bazë të të dhënave të paraqitura në njoftimin për përqendrim dhe shtojcave të tij, konstatoi sa vijon:

Veprimtaritë themelore afariste të ndërmarrjeve të prekura:

Në bazë të Letrës së Qëllimit dhe Kornizës për Transaksionin të datës 02.07.2026, të lidhur ndërmjet Shoqërisë për tregti me shumicë dhe pakicë dhe shërbime TINEKS-MT SHPKNJP eksport-import Shkup, me seli në rr. „Vasil Gjorgov“ nr. 16-1/mansardë 1, Shkup, si Shitës dhe

Proeks Internacional L.L.C., si Blerës, palët janë pajtuar për kushtet kryesore komerciale dhe strukturën e Transaksionit të paraparë, që lidhet me blerjen nga Blerësi të biznesit të shitjes me pakicë të supermarketeve, i cili aktualisht menaxhohet nga TINEKS-MT SHPKNJP eksport-import Shkup në Republikën e Maqedonisë së Veriut, ndër të tjera, nën emrat „Tinex“, „SuperTinex“, „Tinex Delikates“, „Konto“ dhe „Spot“ („**Biznesi**“).

TINEKS-MT SHPKNJP eksport-import Shkup, pas nënshkrimit të Letrës së Qëllimit dhe Kornizës për Transaksionin, më 14.07.2026 e ka regjistruar TINEKS MARKET SHPKNJP Shkup, i cili është paraparë të shërbejë si mjet për blerjen dhe operimin e Biznesit. TINEKS MARKET SHPKNJP Shkup do t'i vihet në dispozicion Biznesi ose pjesët përkatëse të Biznesit, në përputhje me kushtet kryesore të dakorduara në Letër dhe siç do të rregullohen më tej në Marrëveshjen paraprake për shitblerjen e pjesës së kapitalit dhe në dokumentacionin përfundimtar për Transaksionin.

Veprimtaria kryesore e Proeks Internacional L.L.C. është tregtia me pakicë në dyqane jo të specializuara, kryesisht me produkte ushqimore, pije dhe produkte të duhanit.

Grupi Proeks është një grup biznesi i diversifikuar nga Kosova, i përbërë nga disa shoqëri tregtare të lidhura që operojnë në fushën e tregtisë, distribucionit, shitjes me pakicë, logjistikës dhe sektorit energjetik, përkatësisht Grupi Proeks mbulon një gamë të gjerë veprimtarish, duke përfshirë importin dhe distribucionin e mallrave të konsumit të gjerë, menaxhimin e zinxhirëve të supermarketeve, tregtinë me produkte ushqimore dhe higjienike, shërbimet logjistike, si dhe tregtinë, magazinimin dhe distribucionin e derivateve të naftës.

Proeks Internacional L.L.C. dhe Grupi të cilit i përket Proeks Internacional L.L.C. nuk kanë subjekte të lidhura të regjistruara në Republikën e Maqedonisë së Veriut, dhe as nuk kanë realizuar ndonjë të ardhur në tregun e Republikës së Maqedonisë së Veriut në vitin 2025.

TINEKS MARKET SHPKNJP Shkup ka një subjekt të lidhur të regjistruar në Republikën e Maqedonisë së Veriut, themeluesin e tij, Shoqërinë për tregti me shumicë dhe pakicë dhe shërbime TINEKS-MT SHPKNJP eksport-import Shkup.

Komisioni konstatoi se përqendrimi i njoftuar bie nën dispozitat e Ligjit, pasi i përmbush kushtet e nenit 12 paragrafi (1) dhe të nenit 14 paragrafi (1), pikat 1) dhe 2) të Ligjit për Mbrojtjen e Konkurrencës.

Komisioni, duke pasur parasysh kriteret nga neni 17 paragrafët (2), (3) dhe (4) të Ligjit për Mbrojtjen e Konkurrencës dhe pikën 6 b) të Udhëzimeve për përcaktimin e rasteve në të cilat, gjatë vlerësimit të përqendrimeve, Komisioni për Mbrojtjen e Konkurrencës zakonisht do të konstatojë se ato janë në përputhje me Ligjin për Mbrojtjen e Konkurrencës, vlerësoi se përqendrimi i njoftuar, megjithëse bie nën dispozitat e Ligjit, është në përputhje me të, pasi nuk do të ketë si pasojë pengimin, kufizimin ose çrregullimin e konsiderueshëm të konkurrencës efektive në treg ose në një pjesë thelbësore të tij, veçanërisht si rezultat i krijimit ose forcimit të pozitës dominuese të pjesëmarrësve.

Duke pasur parasysh këtë vlerësim të përqendrimit, Komisioni vendosi si në dispozitivin e këtij Aktvendimi, në përputhje me nenin 19 paragrafi (1), pika 2) të Ligjit.

Në përputhje me nenin 53 paragrafi (2) të Ligjit, padia nuk e shtyn ekzekutimin e aktvendimit.

Udhëzim për mjetin juridik:

Kundër këtij aktvendimi mund të paraqitet padi për fillimin e kontestit administrativ pranë Gjykatës Administrative, brenda 30 ditëve nga dita e pranimi të aktvendimit.

KOMISIONI PËR MBROJTJEN E KONKURRENCËS

KRYETARE

Mr. Малинка Силјановска Николиќ